



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Agenda Dioecesis Paderbornensis Rituali Romano accommodata**

**Hermann Werner <Paderborn, Bischof>**

**Paderbornæ, 1753**

Initia Quatuor Evangeliorum.

**urn:nbn:de:hbz:466:1-36023**

Si Processio sit pro gratiarum actione, servantur omnia ut in processione Corporis Christi, & finita processione cantatur Te Deum Laudamus, cui in fine subdit Sacerdos.

℣. Benedicamus Patrem & Filium cum sancto Spiritu.

℞. Laudemus & super exaltemus eum in sæcula.

℣. Benedictus es Domine in firmamento caeli.

℞. Et laudabilis & gloriosus & superexaltatus in sæcula.

℣. Domine exaudi orationem meam. ℞. Et clamor meus ad te veniat.

℣. Dominus vobiscum. ℞. Et cum Spiritu tuo.

Oremus.

**D**EUS cujus misericordiae non est numerus, & bonitatis infinitus est Thesaurus, piissimae majestati tuae pro collatis donis gratias agimus, tuam semper clementiam exorantes: ut qui petentibus postulata concedis, eosdem non deserens ad praemia futura disponas.

Deus qui corda fidelium sancti Spiritus illustratione docuisti, da nobis in eodem Spiritu recta sapere, & de ejus semper consolatione gaudere. Deus, qui neminem in te sperantem, nimium affligi permittis: sed pium precibus praestas auditum: pro postulationibus nostris, votisque susceptis gratias agimus te piissime deprecantes, ut à cunctis semper muniamur adversis. Per Dominum nostrum Jesum Christum Filium tuum, qui tecum vivit & regnat in unitate Spiritus Sancti Deus, per omnia saecula saeculorum. ℞. Amen.

Cætera processiones tempore belli pestis, famis sterilitatis &c. cum non deducantur hic ad praxin eas studio omisimus.

## INITIA QUATUOR EVANGELIORUM.

*Secundum Matthæum.*

**L**iber generationis Jesu Christi, filii David, filii Abraham, Abraham genuit Isaac. Isaac autem genuit Jacob. Jacob autem genuit Judam, & fratres ejus. Judas autem genuit Phares, & Zaram de Thamar. Phares autem genuit Esrom. Esrom autem genuit Aram. Aram autem genuit Aminadab. Aminadab autem genuit Naason. Naason autem genuit Salmon. Salmon autem genuit Boos de Raab. Boos autem genuit Obeth ex Ruth. Obeth autem genuit Jesse. Jesse autem genuit David Regem. David autem Rex genuit Salomonem, ex ea, quæ fuit Uriæ. Salomon autem genuit Rhoboam. Rhoboam autem genuit Abiam. Abias autem genuit Afa. Afa autem genuit Josaphat. Josaphat autem genuit Joram. Joram autem genuit Oziam. Ozias autem genuit Joathan. Joathan autem genuit Achaz. Achaz autem genuit Ezechiam. Ezechias autem genuit Manassen. Manasses autem

tem

tem genuit Amon. Amon autem genuit Josiam. Josias autem genuit Jechoniam, & fratres ejus in transmigracione Babylonis. Et post transmigracionem Babylonis Jechonias genuit Salathiel. Salathiel autem genuit Zorobabel. Zorobabel autem genuit Abiud. Abiud autem genuit Sadoch. Sadoch autem genuit Achim. Achim autem genuit Eliud. Eliud autem genuit Eleazar, Eleazar autem genuit Mathan. Mathan autem genuit Jacob. Jacob autem genuit Joseph virum Mariæ, de qua natus est Jesus qui vocatur Christus.

*Secundum Marcum.*

**I**Nitium Evangelii Jesu Christi filii David, sicut scriptum est in Esaia Propheta. Ecce ego mitto angelum meum ante faciem tuam, qui præparabit viam tuam ante te. Vox clamantis in deserto, parate viam Domini, rectas facite semitas ejus. Fuit Joannes in deserto baptizans, & prædicans baptismum poenitentiae in remissionem peccatorum. Et egrediebatur ad eum omnis Judææ regio, & Hierosolymitæ universi, & baptizabantur ab illo in Jordanis flumine confitentes peccata sua. Et erat Joannes vestitus pilis cameli, & zona pellicea circa lumbos ejus. Et locustas & mel sylvestre edebat, & prædicabat, dicens. Venit fortior post me, cujus non sum dignus procumbens solvere corrigiam calceamentorum ejus. Ego baptizavi vos in aqua, ille verò baptizabit vos in Spiritu sancto.

*Secundum Lucam.*

**F**uit in diebus Herodis regis Judææ sacerdos quidam nomine Zacharias de vice Abia, & uxor illi de filiabus Aaron, & nomen ejus Elisabeth. Erant autem justi ambo ante Deum, incedentes in omnibus mandatis & justificationibus Domini sine querela, & non erat illis filius eò quod esset Elisabeth sterilis, & ambo processissent in diebus suis. Factum est autem cum sacerdotio fungeretur Zacharias in ordine vicis suæ ante Deum secundum consuetudinem sacerdotii forte exiit, ut incensum poneret ingressus in templum Domini. Et omnis multitudo populi erat orans foris hora incensi. Apparuit autem illi angelus Domini stans à dextris altaris incensi. Et Zacharias turbatus est videns, & timor irruit super eum. Ait autem ad illum angelus. Ne timeas Zacharia, quoniam exaudita est deprecatio tua, & uxor tua Elisabeth pariet filium, & vocabis nomen ejus Joannem. Et erit tibi gaudium & exultatio, & multi in natiuitate ejus gaudebunt. Erit enim magnus coram Domino. Et vinum & syceram non bibet. Et Spiritu sancto replebitur adhuc ex utero matris suæ. Et multos filiorum Israel convertet ad Dominum Deum ipsorum. Et ipse præcedet ante illum in spiritu & virtute Heliæ, ut convertat corda patrum in filios, & incredulos ad prudentiam justorum, parare domino plebem perfectam.

*Secundum Joannem.*

**I**N principio erat verbum, & verbum erat apud Deum, & Deus erat verbum. Hoc erat in principio apud Deum. Omnia per ipsum facta sunt, & sine ipso factum est nihil. Quod factum est in ipso vita erat, & vita erat lux hominum, & lux in tenebris lucet, & tenebrae eam non comprehenderunt. Fuit homo missus à Deo, cui nomen erat Joannes. Hic venit in testimonium, ut testimonium perhiberet de lumine, ut omnes crederent per illum. Non erat ille lux, sed ut testimonium perhiberet de lumine. Erat lux vera quæ illuminat omnem hominem, venientem in hunc mundum. in mundo erat, & mundus per ipsum factus est, & mundus eum non cognovit. In propria venit, & sui eum non receperunt. Quotquot autem receperunt eum, dedit eis potestatem filios Dei fieri, his qui credunt in nomine ejus, qui non ex sanguinibus, neque ex voluntate carnis, neque ex voluntate viri, sed ex Deo nati sunt. Et verbum caro factum est, & habitavit in nobis. Et vidimus gloriam ejus, gloriam quasi unigeniti à patre plenum gratia & veritate.

*Sic concludendo.*

Per ista Evangelica dicta, indulgeat nobis Dominus noster Jesus Christus universa nostra delicta. Amen.

**PROFESSIO FIDEI CATHOLICÆ,  
QUAM JUXTA CONCILII TRIDENTINI  
DISPOSITIONEM OMNES QUOS CATHEDRALIBUS ET  
SUPERIORIBUS ECCLESIIS PRÆFICI, VEL, QUIBUS DE ILLARUM DIGNITATIBUS,  
CANONICATIBUS, ET ALIIS QUIBISCUNQUE BENEFICIIS CURAM ANIMARUM HA-  
BENTIBUS PROVIDERI CONTINGIT, FACERE DEBENT, QUÆ UT PRÆSTANDA PA-  
ROCHIS; SIC IISDEM SERVIENS, CUM IN SUSCIPIENDIS SACELLANIS ET LUDI-  
MAGISTRIS, TUM IN INFORMANDIS ILLIS, QUI AB ERRORE A DEC-  
CLESIAE GREMIUM REVERTUNTUR.**

*Formula Professionis fidei, ut à Pio IV. Pontifice Maximo  
prescripta est.*

**E**GO N. firma fide credo & profiteor omnia & singula, quæ continentur in Symbolo fidei, quo sancta Romana Ecclesia utitur, videlicet.

Credo in unum Deum Patrem omnipotentem, factorem cœli & terræ, visibilium omnium & invisibilium. Et in unum Dominum nostrum JESUM CHRISTUM, filium DEI unigenitum: & ex Patre natum ante omnia sæcula, DEUM de DEO, lumen de lumine, DEUM verum de DEO vero, genitum non factum consubstantialem Patri, per quem omnia facta sunt. Qui propter nos homines, & propter nostram salutem descendit de cœlis, & incarnatus est de spiritu sancto ex Maria virgine, & homo factus est. Crucifixus etiam pro nobis sub Pontio Pilato, passus, & sepultus est. Et resurrexit tertia die secundum scripturas. Et ascendit in cœlum, sedet ad dexteram Patris. Et iterum venturus est cum gloria judicare vivos & mortuos; cujus regni non erit finis. Et in spiritum sanctum, Dominum, & vivificantem, qui ex Patre filioq; procedit; qui cum Patre & Filio simul adoratur, & conglorificatur; qui locutus est per Prophetas. Et unam sanctam, Catholicam, & Apostolicam